



LE GOUVERNEMENT
DU GRAND-DUCHÉ DE LUXEMBOURG
Ministère de la Mobilité
et des Travaux publics



LE GOUVERNEMENT
DU GRAND-DUCHÉ DE LUXEMBOURG
Ministère de l'Énergie et de
l'Aménagement du territoire

Département de l'énergie

Äntwert vum Minister fir Energie, Claude Turmes, op d'parlamentaresch Fro n°6795 vum 8. September 2022 vum Här Deputéierte Max Hahn iwwert "Plateforme informatique nationale de données énergétiques"

1. Ass déi genannte Plattform zu Lëtzebuerg entretemps geschaaft ginn? Wann net, wat wieren d'Grënn a bis wéini soll se operationell sinn?

Déi national Energiedateplattform gëtt aktuell implementéiert an ass nach net operationell. Den Transportnetzbedreier Creos Luxembourg S.A. huet schonn 2021, zesumme mat deenen anere Stroum- a Gasgestionnaire souwéi de Fournisseuren, mat deenen Aarbechten ugefaangen. Et handelt sech awer ëm en informatesche Projet vu grousser Envergure an enger Planungs- an Entwécklungsphase vun insgesamt e puer Joer. Den Zäitplang gesäit vir, dass di éischt Versioun vun der Plattform am Summer 2023 wäert online goen. Hir komplett Funktionalitéit wäert d'Plattform viraussichtlech 2026 hunn. Wéi an der zweeter Fro duergestallt, kritt d'Plattform eng Rei Funktionalitéiten di all Acteuren um Energiemaart concernéieren, esou dass dësen Zäitplang fir de Projet duerchaus ambitiéis ass, notamment am Verglach zu änleche Projeten, déi an Norwegen, Dänemark, Estland oder an der Belsch ëmgesat goufen.

2. Kann den Här Minister informéieren, wéi eng präzis Funktiounen déi Plattform ubidden soll?

D'Plattform wäert an éischer Linn d'Roll vun engem zentralen Hub fir déi sougenannte Marchéskommunikatioun iwwerhuelen. Heibäi handelt et sech ëm d'Kommunikatioun tëschent Netzbedreier a Fournisseuren, a méiglechen anere Marchésacteurs wéi Agrégateuren, duerch déi Prozedure wéi d'Umeldung vun neie Clienten, Clientswiesselen oder Plënnervirgäנג vollzu ginn, mee och Verbrauchsdonnéeën iwwerdroe ginn. Dëst iwwert eng zentral Plattform ofzewéckele wäert d'Zouverlässegkeet an d'Effikassitéit vun deenen Echange staark verbessern, an och d'Datesécherheet verstärken.

De Client wäert iwwer dës Plattform eng besser Asiicht a seng Energiedonnéeë kréien an eng prezis Kontroll doriwwer wéi eng Donnéeën e mat wéi engen Drëtten well deelen. Dat wäert et innovativen Entrepreneuren am Energie Beräich méi einfach maachen hir Servicer, z.B. am Beräich vun der Flexibilitéit oder Energieeffizienz unzebidden, déi wäerten de Clienten zegutt kommen an d'Energietransitioun facilitéieren.

Dës Dateplattform wäert et och méiglech maache Statistiken, souwuel fir d'Besoinen vun Administratiounen wéi dem ILR oder dem Statec, wéi och fir Recherchezwecker (open data) ze erstellen.

Eng Funktionalitéit wéi d'Plattform Ecowatt wäert di Lëtzebuurger Energiedateplattform net direkt ubidden, well se op Marchésdonnéeë baséiert ass, an net op real time Donnéeën di aus deem Beräich vun der Netzbetriebplanung kommen.

Et gëtt awer aktuell zesumme mat der Creos ënnersicht, ob eng änlech Applikatioun wéi de franséschen Ecowatt kann zu Lëtzebuerg kuerzfristeg ëmgësat ginn.

3. Ass virgesinn, d'Donnéeë vun dëser Plattform op déi eng oder aner Manéier der Ëffentlechkeet zur Verfügung ze stellen?

Jo, d'Donnéeë wäerten, a consolidierter Form, an esou, dass kee Réckschloss op individuell Donnéeë méiglech ass, iwwert den Open Data zur Verfügung gestallt ginn.

Clientë wäerten iwwert d'Plattform och Accès op hir eegen Donnéeë kréien, an och kënnen Drëtten Accès drop ginn (z.B. Energieberoder, Aggrégateur, aner Service provider).

4. Wa jo, ass ugeduecht eng mobil Applikatioun z'entwéckelen?

Am Moment ass ee Web Accès virgesinn, dee selbstverständlech och fir mobil Geräter optimiséiert wäert sinn. Ob eng Applikatioun wäert virgesi ginn, steet nach net fest. Heibäi ass ze bemierken, dass di primär Aufgab vun der Plattform ass Donnéeën de verschiddenen Acteuren zur Verfügung ze stellen. Et ass net de Rôle vun der Plattform dës auszewäerten. Dëst ass eng Aufgab vu Marchésacteuren, déi, soufern de Client dëst erlaabt huet, d'Donnéeë kënnen an hirer eegener App verschaffen an uweisen.

Lëtzebuerg, de 7. Oktober 2022

De Minister fir Energie

(s.) Claude Turmes